

大般若波羅蜜多經卷第四百二十九

唐三藏法師玄奘奉 詔譯

第二分福生品第三十一

爾時佛告天帝釋言。如是如是。如汝所說。憍尸迦。若善男子善女人等。不離一切智智心。以無所得而爲方便。於此般若波羅蜜多。至心聽聞。受持讀誦。精勤修學。如理思惟。廣爲有情宣說流布。或有書寫種種莊嚴。供養恭敬。尊重讚歎。復以種種上妙花鬘塗散等香。衣服瓔珞寶幢幡蓋。諸妙珍奇伎樂燈明。而爲供養。所生福聚。無量無邊。不可思議。不可稱計。何以

故。憍尸迦。以此般若波羅蜜多。能辦如來應正等覺。一切智道相智。一切相智。亦辦布施波羅蜜多。乃至般若波羅蜜多。亦辦內空。乃至無性自性空。亦辦四念住廣說。乃至十八不共法。亦辦五眼六神通。亦辦一切三摩地。門陀羅尼門。亦辦成熟有情嚴淨佛土。亦辦一切聲聞獨覺及無上乘。亦辦如來應正等覺所證無上正等菩提。以是故。憍尸迦。若善男子。善女人等。不離一切智智心。以無所得而爲方便。於此般若波羅蜜多。至心聽聞受持讀誦。精勤修學。如理思惟。廣爲有情宣說流布。或有書寫。種種莊嚴。乃至

燈明而爲供養。以前所造宰堵波福。比此福聚。百分不及一。千分不及一。百千分不及一。乃至鄔波尼殺曇分亦不及一。何以故。憍尸迦。若此般若波羅蜜多甚深經典。人中流布。卽此世閒佛寶法寶。苾芻僧寶。終不隱沒。若此般若波羅蜜多甚深經典。人中住者。世閒常有十善業道。若四靜慮。四無量。四無色定。若布施波羅蜜多。乃至般若波羅蜜多。若內空。乃至無性自性空。若四念住。廣說。乃至十八不共法。若一切三摩地。門陀羅尼門。若一切智道。相智。一切相智。若刹帝利大族。婆羅門大族。長者大族。居士大族。若

四大王眾天。乃至非想非非想處天。若聲聞乘獨覺乘。無上乘。若預流一來不還阿羅漢。獨覺若菩薩摩訶薩。成熟有情。嚴淨佛土。若諸如來。應正等覺。證得無上正等菩提。轉妙法輪。度無量眾。如是勝事。終不隱沒。

第二分功德品第三十二

爾時三千大千世界。所有四大王眾天。乃至色究竟天。同聲共白。天帝釋言。大仙。於是甚深般若波羅蜜多。應受。應持。應讀。應誦。應精勤修學。應如理思惟。應供養恭敬。尊重讚歎。何以故。大仙。若受持讀誦精勤。

修學如理思惟。供養恭敬。尊重讚歎。如是般若波羅蜜多。則令一切惡法損滅。善法增益。亦令一切天眾增益。諸阿素洛朋黨損滅。亦令一切佛眼法眼僧眼不滅。亦令一切佛種法種僧種不斷。大仙當知。由三寶種不斷絕故。世閒便有布施波羅蜜多。乃至般若波羅蜜多。亦有內空。乃至無性自性空。亦有四念住。廣說乃至十八佛不共法。亦有一切三摩地門陀羅尼門。亦有一切智道相智一切相智。亦有預流果。乃至阿羅漢果。亦有獨覺菩提。亦有菩薩摩訶薩行。亦有無上正等菩提。是故大仙。於此般若波羅蜜多。應

受持讀誦。精勤修學。如理思惟。供養恭敬。尊重讚歎。爾時佛告天帝釋言。憍尸迦。汝應於此甚深般若波羅蜜多。受持讀誦。精勤修學。如理思惟。供養恭敬。尊重讚歎。何以故。憍尸迦。若阿素洛及惡朋黨起。如是念。我等當與天帝釋軍交陣戰諍。爾時汝等諸天眷屬。應各至誠誦念。如是甚深般若波羅蜜多。供養恭敬。尊重讚歎。時阿素洛及諸朋黨所起惡心。卽皆息滅。憍尸迦。若諸天子或諸天女。五衰相現。其心驚惶。恐墮惡趣。爾時汝等諸天眷屬。應住其前。至誠誦念。如是般若波羅蜜多。時彼天子或彼天女。聞是般若

波羅蜜多。善根力故。於此般若波羅蜜多生淨信故。五衰相沒。身意泰然。設有命終。還生本處。受天富樂。倍勝於前。何以故。憍尸迦。聞信般若波羅蜜多功德。威力甚廣大。故憍尸迦。若善男子。善女人等。或諸天子。及諸天女。甚深般若波羅蜜多。一經其耳。善根力故。定當漸次證得無上正等菩提。何以故。憍尸迦。過去未來現在諸佛。及諸弟子。一切皆學如是般若波羅蜜多。證得無上正等菩提。入無餘依般涅槃界。何以故。憍尸迦。如是般若波羅蜜多。普攝一切菩提分法。若諸佛法。若菩薩法。若獨覺法。若聲聞法。皆具攝。

故爾時天帝釋白佛言。世尊。如是般若波羅蜜多。是大神呪。是大明呪。是無上呪。是無等等呪。是一切呪王。最尊最勝。最上最妙。能伏一切。不爲一切之所降伏。何以故。世尊。如是般若波羅蜜多。能除一切惡不善法。能攝一切殊勝善法。爾時佛告天帝釋言。如是如是。如汝所說。何以故。憍尸迦。過去未來現在諸佛。皆因如是甚深般若波羅蜜多。大神呪王。證得無上正等菩提。轉妙法輪。度無量衆。所以者何。依因如是甚深般若波羅蜜多。大神呪王。世間便有十善業道。若四靜慮。四無量。四無色定。若布施波羅蜜多。乃至

般若波羅蜜多。若內空乃至無性自性空。若四念住。廣說乃至十八佛不共法。若眞如法界法性實際。不虛妄性。不變異性。法定法住。不思議界。若四聖諦。若五眼六神通。若預流果。乃至阿羅漢果。若獨覺菩提。若諸菩薩摩訶薩行。若佛無上正等菩提。若一切智道相智。一切相智。復次。憍尸迦。依因菩薩摩訶薩故。世間便有十善業道。廣說乃至一切相智。譬如依因滿月輪故。諸星宿等皆得增明。如是依因諸菩薩故。十善業道。廣說乃至一切相智。皆得顯了。若諸如來應正等覺。未出世時。唯有菩薩具足種種方便善巧。

爲諸有情無倒宣說一切世閒出世閒法。菩薩所有方便善巧皆從如是甚深般若波羅蜜多而得生長。諸菩薩摩訶薩成就方便善巧力故能行布施波羅蜜多乃至般若波羅蜜多能行內空乃至無性自性空能行四念住廣說乃至十八佛不共法不證聲聞及獨覺地成熟有情嚴淨佛土具足攝取壽量圓滿佛土圓滿眷屬圓滿眾具圓滿色力圓滿乃至證得一切相智皆由般若波羅蜜多而得成就復次憍尸迦若善男子善女人等於此般若波羅蜜多至心聽聞受持讀誦精勤修學如理思惟書寫解說廣令流

布。當得成就。現在未來殊勝功德。時天帝釋便白佛言。是善男子善女人等。云何成就。現在未來殊勝功德。佛言。憍尸迦。若善男子善女人等。於此般若波羅蜜多。至心聽聞。受持讀誦。精勤修學。如理思惟。書寫解說。廣令流布。是善男子善女人等。現在不爲毒藥所害。刀兵所傷。火所焚燒。水所漂溺。乃至不爲四百四病之所夭歿。除先定業。現世應受。憍尸迦。是善男子善女人等。若遭官事。怨賊逼迫。至心誦念。如是般若波羅蜜多。若至其所。終不爲彼譴罰加害。何以故。憍尸迦。如是般若波羅蜜多。威德勢力。法令爾故。憍

尸迦。是善男子善女人等。若有欲至國主王子大臣等處。至心誦念如是般若波羅蜜多。必爲王等歡喜問訊。供養恭敬尊重讚歎。何以故。憍尸迦。是善男子善女人等。常於有情發起慈悲喜捨心故。憍尸迦。是善男子善女人等。常得成就如是等類。現在功德。憍尸迦。若善男子善女人等。於此般若波羅蜜多。至心聽聞受持讀誦。精勤修學。如理思惟。書寫解說。廣令流布。是善男子善女人等。隨所生處。常不遠離十善業道。若四靜慮。四無量。四無色定。若布施波羅蜜多。乃至般若波羅蜜多。若內空。乃至無性自性空。若四

念住。廣說乃至十八佛不共法。若一切三摩地門陀羅尼門。若一切智道相智一切相智。不墮地獄傍生鬼界。除願往彼成熟有情。隨所生處。常具諸根支體無缺。永不生在貧窮下賤工師襍類屠膾漁獵盜賊獄吏及補羯娑旃荼羅家。若戍達羅貿易卑族。隨所生處。具三十二大丈夫相。八十隨好圓滿莊嚴。一切有情見者歡喜。多生有佛嚴淨土中。蓮華化生。不造眾惡。常不遠離菩薩神通。隨心所願遊諸佛土。從一佛國至一佛國。親近供養諸佛世尊。成熟有情。嚴淨佛土。聽聞正法。如說修行。漸次證得一切智智。憍尸

迦。是善男子善女人等。當得成就如是等類未來功德。以是故。憍尸迦。若善男子善女人等。欲得如是現在未來殊勝功德。乃至無上正等菩提者。應常不離一切智智心。以無所得爲方便。於此般若波羅蜜多甚深經典。至心聽聞。受持讀誦。精勤修學。如理思惟。書寫解說。廣令流布。復以種種上妙花鬘塗散等香。衣服瓔珞寶幢旛蓋。諸妙珍奇伎樂燈明而爲供養。

第二分外道品第三十三

時有眾多外道梵志。爲求佛過。來詣佛所。時天帝釋見已念言。今此眾多外道梵志。來趣法會。同求佛短。

將非般若畱難事耶。我當誦念從佛所受甚深般若波羅蜜多。令彼邪徒退還本所。念已便誦甚深般若波羅蜜多。於是眾多外道梵志遙伸敬相。右繞世尊從所來門復道而去。時舍利子見已念言。彼有何緣適來還去。爾時佛告舍利子言。彼外道等來求我失。由天帝釋誦念般若波羅蜜多。令彼還去。舍利子。我不見彼外道梵志有少白法。唯懷惡心爲求我過來至我所。舍利子。我都不見一切世閒有天魔梵。若諸沙門婆羅門等。有情之類。說般若時。懷勃惡心來求得便。何以故。舍利子。由此三千大千世界。所有四大

王眾天乃至色究竟天。若諸聲聞獨覺菩薩佛。及一切具大威力龍神藥叉人非人等。皆共守護如是般若波羅蜜多。不令眾惡爲作留難。何以故。舍利子。是諸天等皆依般若波羅蜜多威力生故。又舍利子。十方各如苑伽沙界一切如來應正等覺聲聞獨覺菩薩諸天龍神藥叉人非人等。皆共守護如是般若波羅蜜多。不令眾惡爲作留難。何以故。舍利子。彼諸佛等。皆依般若波羅蜜多威力生故。爾時惡魔竊作是念。今者如來應正等覺四眾圍繞。及欲色界諸天人等。皆同集會。宣說般若波羅蜜多。此中定有菩薩摩

訶薩得受無上正等菩提記。我當往至破壞其眼。作是念已。化作四軍。奮威勇銳。來詣佛所。時天帝釋。見已念言。將非惡魔化作此事。來欲惱佛。并與般若波羅蜜多。而作畱難。何以故。如是四軍嚴飾殊麗。影堅勝軍。釋迦王種。栗咄毗種。力士種等。所有四軍。皆不能及。由此定知。魔所化作。惡魔長夜伺求佛短。壞諸有情所修勝事。我當誦念。從佛所受甚深般若波羅蜜多。令彼惡魔退還本所。念已。便誦甚深般若波羅蜜多。於是惡魔復道而去。甚深般若波羅蜜多。力所逼故。時眾會中所有四大王眾天。乃至色究竟天。各

各化作種種天花。及香鬘等諸妙供具。涌身空中而散佛上。合掌恭敬。同白佛言。願此般若波羅蜜多在瞻部洲人中久住。何以故。世尊。乃至如是甚深般若波羅蜜多在瞻部洲人中流布。當知此處佛寶法寶。苾芻僧寶。久住不滅。於此三千大千世界。乃至十方無量無數無邊世界。亦復如是。由此菩薩摩訶薩眾。及殊勝行。亦可了知。世尊。隨諸方域。有善男子善女人等。以淨信心書持如是甚深般若波羅蜜多。供養恭敬。尊重讚歎。當知是處有妙光明。除滅暗冥。生諸勝利。爾時佛告天帝釋等諸天眾言。如是如是。如汝

所說乃至如是甚深般若波羅蜜多。在贍部洲人中
流布。當知此處佛寶法寶苾芻僧寶久住不滅。於此
三千大千世界乃至十方無量無數無邊世界亦復
如是。由此菩薩摩訶薩眾及殊勝行亦可了知。隨諸
方域有善男子善女人等。以淨信心書持如是甚深
般若波羅蜜多。供養恭敬尊重讚歎。當知是處有妙
光明除滅暗冥。生諸勝利。時諸天眾復各化作種種
天花及香鬘等而散佛上。重白佛言。若善男子善女
人等。於此般若波羅蜜多甚深經典。至心聽聞受持
讀誦。精勤修學如理思惟。書寫解說廣令流布。是善

男子善女人等。魔及魔軍不能得便。我等天眾亦常隨逐。勤加擁護。令無損惱。何以故。世尊。是善男子善女人等。我等諸天敬事如佛。或如似佛。尊重法故。時天帝釋復白佛言。是善男子善女人等。非少善根能成此事。必於先世無量佛所。多集善根。多發正願。多供養佛。多事善友。乃能於此甚深般若波羅蜜多。至心聽聞。受持讀誦。精勤修學。如理思惟。書寫解說。廣令流布。世尊。若善男子善女人等。欲得諸佛一切相智。當求般若波羅蜜多。欲得般若波羅蜜多。當求諸佛一切相智。何以故。諸佛所得一切相智。皆從般若

波羅蜜多而得生故。一切般若波羅蜜多。皆從諸佛一切相智而得生故。所以者何。諸佛所得一切相智。不異般若波羅蜜多。一切般若波羅蜜多。不異諸佛一切相智。諸佛所得一切相智。與此般若波羅蜜多。當知無二亦無二處。爾時佛告天帝釋言。如是如是。如汝所說。是故般若波羅蜜多。功德威神最尊最勝。第二分天來品第三十四之一。

爾時具壽慶喜。白佛言世尊。何緣如來應正等覺。不廣稱讚布施等五波羅蜜多。乃至十八佛不共法。但廣稱讚第六般若波羅蜜多。佛告慶喜。第六般若波

羅蜜多。能與前五波羅蜜多。乃至十八佛不共法。爲尊爲導。故我但廣稱讚般若波羅蜜多。復次慶喜。於意云何。若不迴向一切相智。而修布施乃至十八佛不共法。可名眞修布施波羅蜜多。乃至十八佛不共法不。慶喜對曰。不也。世尊。不也。善逝。佛言。慶喜。要由迴向一切相智。而修布施乃至十八佛不共法。乃可名爲眞修布施波羅蜜多。乃至十八佛不共法。是故般若波羅蜜多。能與前五波羅蜜多。乃至十八佛不共法。爲尊爲導。故我但廣稱讚般若波羅蜜多。具壽慶喜。復白佛言。云何迴向一切相智。而修布施乃至

十八佛不共法。方得名爲眞修布施波羅蜜多。乃至十八佛不共法。佛言慶喜。以無二爲方便。無生爲方便。無所得爲方便。迴向一切相智。而修布施乃至十八佛不共法。如是迴向一切相智。而修布施乃至十八佛不共法。乃得名爲眞修布施波羅蜜多。乃至十八佛不共法。具壽慶喜。復白佛言。以何無二爲方便。無生爲方便。無所得爲方便。迴向一切相智。而修布施乃至十八佛不共法。乃得名爲眞修布施波羅蜜多。乃至十八佛不共法。佛言慶喜。以色受想行識乃至無上正等菩提。無二爲方便。無生爲方便。無所得

爲方便。迴向一切相智。而修布施。乃至十八佛不共法。方得名爲眞修布施波羅蜜多。乃至十八佛不共法。具壽慶喜。白言世尊。云何以色受想行識。乃至無上正等菩提。無二爲方便。無生爲方便。無所得爲方便。迴向一切相智。而修布施。乃至十八佛不共法。乃得名爲眞修布施波羅蜜多。乃至十八佛不共法。佛言慶喜。色受想行識。乃至無上正等菩提。無上正等菩提性空。何以故。以色受想行識。乃至無上正等菩提。與布施波羅蜜多。乃至十八佛不共法。皆無二無二處故。慶喜當知由般若波

羅蜜多故。能迴向一切相智。由迴向一切相智故。能令布施波羅蜜多。乃至十八佛不共法。得至究竟。是故般若波羅蜜多。於前五種波羅蜜多。乃至十八佛不共法。爲尊爲導。故我但廣稱讚般若波羅蜜多。慶喜。當知譬如大地。以種散中眾緣和合。則得生長。應知大地與種生長。爲所依止。爲能建立。如是般若波羅蜜多。及所迴向一切相智。與前五種波羅蜜多。乃至十八佛不共法。爲所依止。爲能建立。令得生長。故此般若波羅蜜多。於前五種波羅蜜多。乃至十八佛不共法。爲尊爲導。故我但廣稱讚般若波羅蜜多。非

布施等。爾時天帝釋白佛言。世尊。今者如來應正等覺。於此般若波羅蜜多一切功德。說猶未盡。所以者何。我從世尊所受般若波羅蜜多。功德深廣無量無邊際。諸善男子善女人等。於此般若波羅蜜多。至心聽聞受持讀誦。精勤修學。如理思惟。廣爲有情宣說流布。所獲功德。亦無邊際。若有書寫如是般若波羅蜜多。甚深經典。種種嚴飾。復以無量上妙花鬘塗散等香。衣服瓔珞寶幢旛蓋。諸妙珍奇伎樂燈明而爲供養。所獲功德。亦無邊際。世尊。若善男子善女人等。於此般若波羅蜜多甚深經典。至心聽聞受持讀誦。

精勤修學如理思惟。書寫解說廣令流布。由此因緣。世閒便有十善業道。若四靜慮。四無量。四無色定。若布施波羅蜜多。乃至般若波羅蜜多。若內空乃至無性自性空。若四念住。廣說乃至十八佛不共法。若預流果乃至阿羅漢果。若獨覺菩提。若諸菩薩摩訶薩行。若佛無上正等菩提。若諸世閒所有勝事。無不出現。爾時佛告天帝釋言。憍尸迦。我不說此甚深般若波羅蜜多。但有如前所說功德。何以故。憍尸迦。甚深般若波羅蜜多。具足無邊勝功德故。憍尸迦。我亦不說於此般若波羅蜜多甚深經典。至心聽聞受持讀

誦精勤修學如理思惟廣爲有情宣說流布及能書寫種種嚴飾復以無量上妙花鬘塗散等香衣服瓔珞寶幢旛蓋諸妙珍奇伎樂燈明而爲供養諸善男子善女人等。但有如前所說功德何以故。憍尸迦。若善男子善女人等不離一切智智心以無所得爲方便於此般若波羅蜜多甚深經典至心聽聞受持讀誦精勤修學如理思惟廣爲有情宣說流布或復書寫種種嚴飾復以無量上妙花鬘乃至燈明而爲供養是善男子善女人等成就無量殊勝戒蘊定蘊慧蘊解脫蘊解脫智見蘊憍尸迦是善男子善女人等。

當知如佛。何以故。受持過去未來現在一切如來應正等覺無上道故。決定趣向佛菩提故。利益安樂一切有情無窮盡故。超過聲聞獨覺地故。憍尸迦。聲聞獨覺。所有戒蘊定蘊慧蘊解脫蘊。智見蘊。比此善男子善女人等。所有戒蘊定蘊慧蘊解脫蘊。解脫智見蘊。百分不及一。千分不及一。乃至鄔波尼殺曇分亦不及一。何以故。憍尸迦。是善男子善女人等。超過一切聲聞獨覺下劣心想。於諸聲聞獨覺乘法。終不稱讚於一切法。無所不知。謂能正知無所有故。憍尸迦。若善男子善女人等。不離一切智智心。以無所

得爲方便。於此般若波羅蜜多甚深經典。至心聽聞。受持讀誦。精勤修學。如理思惟。廣爲有情宣說。流布。或復書寫。種種嚴飾。復以無量上妙花鬘。乃至燈明。而爲供養。我說獲得現在未來無量無邊功德勝利。時天帝釋。卽白佛言。我等諸天。常隨衛護。是善男子。善女人等。不令一切人非人等。種種惡緣之所惱害。爾時佛告天帝釋言。憍尸迦。若善男子善女人等。以應一切智智心。用無所得爲方便。於此般若波羅蜜多。甚深經典。受持讀誦。時有無量百千天子。爲聽法故。皆來集會。歡喜踊躍。敬受如是甚深般若波羅蜜

多。憍尸迦。若善男子善女人等。以應一切智智心。用無所得爲方便。宣說如是甚深般若波羅蜜多相應之法。時有無量諸天子等。皆來集會。以天威力。令說法師。增益辯才。宣暢無盡。憍尸迦。若善男子善女人等。以應一切智智心。用無所得爲方便。宣說如是甚深般若波羅蜜多。時有無量諸天子等。敬重法故。皆來集會。以天威力。令說法師。辯才無滯。設有障難。不能遮斷。憍尸迦。諸善男子善女人等。以應一切智智心。用無所得爲方便。於此般若波羅蜜多甚深經典。至心聽聞。受持讀誦。精勤修學。如理思惟。廣爲有情。

宣說流布。或復書寫眾寶嚴飾。復以種種上妙花鬘。乃至燈明而爲供養。於現在世。當獲無邊功德勝利。魔及魔軍不能擾惱。復次憍尸迦。若善男子善女人等。於四眾中。宣說如是甚深般若波羅蜜多。心無怯怖。不爲一切論難所伏。何以故。憍尸迦。彼由如是甚深般若波羅蜜多所加祐故。又此般若波羅蜜多祕蜜藏中。具廣分別一切法故。所謂善法。非善法。有記法。無記法。有漏法。無漏法。世閒法。出世閒法。有爲法。無爲法。聲聞法。獨覺法。菩薩法。如來法。諸如是等無量百千差別法門。皆入此攝。又由如是諸善男子善

女人等。善住內空。乃至無性自性空故。都不見有能論難者。亦不見有所論難者。亦不見有所說般若波羅蜜多。以是故。憍尸迦。此善男子善女人等。由此般若波羅蜜多。大威神力所護持故。不爲一切異學論難。及諸怨敵之所屈伏。復次憍尸迦。若善男子善女人等。於此般若波羅蜜多甚深經典。至心聽聞受持讀誦。精勤修學。如理思惟。書寫解說。廣令流布。是善男子善女人等。心常不驚不怖。心不沈沒。亦不憂悔。何以故。憍尸迦。是善男子善女人等。都不見有可驚可恐。可怖沈沒憂悔事故。憍尸迦。若善男子善

女人輩。欲得此等現在無邊功德勝利。當於如是甚深般若波羅蜜多。至心聽聞受持讀誦。精勤修學。如理思惟。書寫解說。廣令流布。供養恭敬。尊重讚歎。無得暫捨。復次。憍尸迦。若善男子善女人等。以應一切智智心。用無所得爲方便。於此般若波羅蜜多甚深經典。至心聽聞受持讀誦。精勤修學。如理思惟。書寫解說。廣令流布。供養恭敬。尊重讚歎。是善男子善女人等。恆爲父母師長親友國王大臣。及諸沙門婆羅門等之所愛敬。亦爲十方無邊世界一切如來應正等覺菩薩摩訶薩。獨覺阿羅漢。不還一來預流果等。

之所愛念。復爲世閒諸天魔梵人及非人阿素洛等之所愛護。是善男子善女人等。成就最勝無斷辯才。於一切時修行布施。乃至般若波羅蜜多。安住內空。乃至無性自性空。修行四念住。廣說乃至十八佛不共法。修行一切三摩地。門陀羅尼門。成熟有情嚴淨佛土。修行一切智道。相智一切相智。恆無懈廢。是善男子善女人等。不爲一切外道異論。及諸怨敵之所降伏。而能降伏外道異論。及諸怨敵。憍尸迦。若善男子善女人等。欲得如是現在未來無斷無盡功德勝利。應於如是甚深般若波羅蜜多。以應一切智智心。

用無所得爲方便。至心聽聞受持讀誦。精勤修學。如理思惟。書寫解說。廣令流布。供養恭敬。尊重讚歎。復次。憍尸迦。若善男子。善女人等。書寫如是甚深般若波羅蜜多。種種莊嚴。置清淨處。供養恭敬。尊重讚歎。時此三千大千世界。及餘十方無邊世界。所有四天王眾天。乃至廣果天。已發無上菩提心者。恆來是處。觀禮讀誦如是般若波羅蜜多。供養恭敬。尊重讚歎。右繞禮拜。合掌而去。所有淨居天。謂無煩天。無熱天。善現天。善見天。色究竟天。亦恆來此觀禮讀誦如是般若波羅蜜多。供養恭敬。尊重讚歎。右繞禮拜。合掌。

而去。時此三千大千世界。及餘十方無邊世界。有大威德諸龍。藥叉。健達縛。阿素洛。揭路荼。緊捺落。莫呼洛伽。人非人等。亦恆來此觀禮讀誦。如是般若波羅蜜多。供養恭敬。尊重讚歎。右繞禮拜。合掌而去。憍尸迦。是善男子善女人等。應作是念。今此三千大千世界。及餘十方無邊世界。所有四大王眾天。乃至色究竟天。并餘無量。有大威德諸龍。藥叉。健達縛。阿素洛。揭路荼。緊捺落。莫呼洛伽。人非人等。常來至此觀禮讀誦。我所書寫甚深般若波羅蜜多。供養恭敬。尊重讚歎。右繞禮拜。合掌而去。此我則爲已設法施。作是

念已歡喜踊躍。令所獲福倍復增長。憍尸迦。是善男子善女人等。由此三千大千世界。及餘十方無邊世界。所有四大王眾天。乃至色究竟天。并餘無量有大威德諸龍。藥叉。健達縛。阿素洛。揭路荼。緊捺落。莫呼洛伽。人非人等。常來至此。隨逐擁護。不爲一切人非人等之所惱害。唯除宿世定惡業因。現在應熟。或轉重業現世輕受。憍尸迦。是善男子善女人等。由此般若波羅蜜多甚深經典。大威神力。獲如是等現世種種功德勝利。謂諸天等。已發無上菩提心者。或依佛法。已獲殊勝利樂事者。敬重法故。恆來至此。隨逐擁

護增其勢力。何以故。憍尸迦。是善男子善女人等。已發無上正等覺心。恆爲救拔。諸有情故。恆爲成熟。諸有情故。恆爲不捨。諸有情故。恆爲利樂。諸有情故。彼諸天等。亦復如是。由此因緣。常來擁護。是善男子善女人等。令無惱害。

大般若波羅蜜多經卷第四百二十九

音釋

漂溺

漂音飄。浮也。溺乃歷切。沈也。沒也。

天歿

天於兆切。少歿也。又不盡。天年曰天歿。

譴罰

譴詰戰切。謫問也。罰音伐。罪罰也。

屠膾

屠音徒。殺也。膾古外切。肉也。屠膾蓋屠

宰之類也

獵逐禽也。

補羯娑

梵語也。此謂昇死屍等之賤類也。羯居謁切。

旃

茶羅

梵語也亦云旃陀羅此云屠者旃諸延切茶同都切

戍達羅

梵語也亦云首陀此

云農田種

貿易

候切莫

勃惡

勃蒲味切逆也

栗帖毗

亦云離

車此云仙族

健達縛

梵語也亦云乾闥婆此云香

王帖音帖

陰帝釋樂神也健渠建切

揭路茶

梵語也亦云迦樓羅此云金翅鳥揭居謁切茶同都切

緊捺洛

梵語也亦

云緊那羅此云疑神又云人非人捺乃八切